



# CELEBRACIÓN EN OS COTOS

25 – 26 de xullo do 2020

XVII DO TEMPO ORDINARIO



NON MÁIS  
VIOLENCIA  
DE XÉNERO



OS COTOS COA IGUALDADE VERDADEIRA DAS PERSOAS,  
COS POBOS QUE SOFREN INJUSTIZA E ABANDONO,  
COS REFUXIADOS E MARXINADOS DA SOCIEDADE,  
E COA NATUREZA MALTRATADA



## 1.- ENCONTRO EN FAMILIA

### SAÚDO DE BENVIDA

🎵 *Amigos nas penas*

*Celebrante:*

Benvidos sexamos todos a esta celebración. Reunímonos para vivir o tesouro da fe e facémolo no nome do Pai e do Fillo e do Espírito Santo.

Os evanxelistas reuniron as parábolas de Xesús para escribilas xuntas todas aquelas que nos falan do Reino, o proxecto de vida que El seguiu e que quere que nós sigamos.

Estes domingos imos escoitando algunhas delas, e hoxe preséntansenos dúas delas moi semellantes: o tesouro escondido e a perla.

Todos buscamos grandes ou pequenos tesouros na vida: familia, amizade, amor, felicidade...

Segundo os imos atopando, deixamos de lado outras realidades, e nos agarramos a eles con todas as nosas forzas.

Hoxe, neste momento, temos diante de nós un gran tesouro: vivir e compartir a nosa fe en Xesús, participar na realidade do Reino de Deus xa na terra.

Que aproveitemos este encontro con Deus e cos irmáns para atopar a ilusión e a esperanza que nos dá o sabernos chamados por Deus para participar no seu plan de salvación.

**Celebrante:** *Na busca dos tesouros da nosa vida somos capaces de cometer erros e ser egoístas, deixando moitas veces de lado a outras persoas. Xesús móstranos que no noso camiño todos somos importantes e non podemos deixar a ninguén só ou abandonado. Por iso agora queremos pedir perdón e comprometernos:*

**Monitor/a**

- **Comprometémonos con Xesús a vivir querendo facer sempre o ben?**

**SI, COMPROMETÉMONOS**

- **Comprometémonos con Xesús a esforzarnos por non virarlle as costas ás persoas máis necesitadas da nosa sociedade?**

**SI, COMPROMETÉMONOS**

- **Comprometémonos con Xesús a seguir o seu exemplo e a vivir levando con nós o tesouro do evanxeo e da fe?**

**SI, COMPROMETÉMONOS**

**Celebrante:** *Deus todopoderoso teña piedade de nós e dos que teñen lugar no noso corazón e na nosa vida, e aos que sofren as consecuencias da pandemia. A todos, o Señor nos conceda o perdón e nos leve á vida eterna. Amén.*

## **ORACIÓN PROPIA DO DÍA**

**Celebrante:** *Rematamos a primeira parte da celebración confiando nas mans de Deus Pai a nosa oración e pedimos que atopemos o tesouro de vivir en comunidade a nosa fe.*

*(silenzo)*

Deus, Noso Pai,

Ti es a protección dos que esperan en Ti,  
e sen Ti nada é santo nin ten valor.

Guíanos e axúdanos coa túa misericordia,  
para que, facendo un bo uso dos bens temporais,  
con responsabilidade persoal,  
participemos xa nos bens eternos.

Pedímoscho polo mesmo Xesucristo,  
Noso Señor. Amén

## **2.- PROCLAMACIÓN DA PALABRA DE DEUS**

**(sentad@s)**

**Monitor/a:** *As dúas parábolas que nos conta Xesús no Evanxeo de hoxe son para nós un novo motivo de esixencia na responsabilidade que temos con respecto a Deus e aos outros. Tamén nestes momentos se nos pide coidar o tesouro da nosa saúde e a dos outros con responsabilidade persoal e coherencia.*

## LECTURA DA CARTA AOS ROMANOS

Irmáns e irmás:

Sabemos que todo colabora para o ben dos que aman a Deus, dos que foron escolleitos segundo os seus designios. Pois El distinguiunos primeiro e predestinouos a reproducirmos a imaxe do seu Fillo, de tal maneira que el sexa o primoxénito entre moitos irmáns. E a eses que predestinou, tamén os chamou; e a eses que chamou, tamén os xustificou; e a eses que xustificou, tamén lles deu a súa gloria.

### Palabra do Señor

🎵 **nº 41 Quen nos vai separar de Ti?**

SALMO

(en pé) Leccionario I A páx 231 Mt 13, 44-52 EVANXEO

## PROCLAMACIÓN DO SANTO EVANXEO SEGUNDO MATEO

Naquel día dilles Xesús ás multitudes:

O Reino dos Ceos é semellante a un tesouro agachado nunha leira: o home que o atopou vólveo a agachar; e, cheo de alegría, vai vender canto ten para mercar aquela leira.

Tamén se parece o Reino dos Ceos a un tratante de perlas finas: en atopando unha de grande valor, foi vender canto tiña e mercouna.

Do mesmo xeito é semellante o Reino dos Ceos a un aparello de rede largado no mar, que recolleu peixes de todas as castes. Unha vez cheo, tiran por el para a ribeira e, sentados, escollen os bos nun queipo e os malos tiran con eles. Así será na fin do mundo: sairán os anxos e arredarán os malos dos xustos para botalos no forno do lume; alí será o pranto e o renxer dos dentes.

-¿Entendedes todo isto?

Eles responderon:

-Entendemos.

El concluíu:

-Por iso todo letrado que se fai discípulo do Reino dos Ceos parécese ao dono dunha casa que saca das súas arcas o novo e mailo vello.

### Palabra do Señor

(sentad@s) gardamos uns instantes de silencio para acoller a palabra no corazón



(en pé)

## PROFESIÓN DA FE

**Celebrante:** *Neste encontro de fogar acollemos o evanxeo coma tesouro da fe, e proclamamos coas nosas voces o credo que nos une en comunidade como igrexa de Xesús:*

***Creo, Señor, pero aumenta a miña fe***

### ***Monitor/a***

*Credes en Deus, no Deus que é Pai e Nai, que nos creou á súa imaxe, que nos ama, nos acolle, e que nos convida a amar e a acoller facendo evanxeo?*

***Creo, Señor, pero aumenta a miña fe***

*Credes en Xesús, que quixo compartir a nosa vida, que o fixo sentíndose irmán con todos, e que con palabras e feitos nos convida a dar froitos para o Reino de Deus?*

***Creo, Señor, pero aumenta a miña fe***

*Credes no Espírito de Deus, que nos dá forzas para facer e sentirnos unha comunidade na que todos somos importantes e necesarios?*

***Creo, Señor, pero aumenta a miña fe***

*Credes na igrexa, comunidade que anuncia o amor, que proclama o perdón e que camiña enfortecida polo exemplo de tantos homes e mulleres que viven dando froitos de evanxeo?*

***Creo, Señor, pero aumenta a miña fe***

## ORACIÓN UNIVERSAL

**Celebrante:** *Movidos por Xesús, no espírito de querer vivir a unidade da fe cos nosos irmáns, imos rezar xuntos dicindo:*

**Señor, escoita ao teu pobo.**

### ***Monitor/a***

- 1. Para, dende a casa, ser igrexa que ofrece escoita, tolerancia e responsabilidade persoal, oremos*
- 2. Polas persoas de bo corazón, para que sigan sendo exemplo para todos nós, oremos*
- 3. Polas persoas que son coherentes, para que co seu xeito de ser, nos sigan amosando o evanxeo coma tesouro de vida, oremos*
- 4. Pedimos por nós e polas persoas que teñen a responsabilidade de gobernar, para que non pechemos os ollos e o corazón, ante os nenos e nenas, que viven a vida, non coma tesouro senón como traxedia, oremos*
- 5. Pedimos tamén por todas as persoas que buscan os tesouros da paz, do agarimo, da solidariedade, oremos*

**Celebrante:** *Grazas Señor porque hoxe, coma sempre, estás á nosa beira escoitándonos e acollendo as nosas preocupacións e desexos e nos convidas a acoller o tesouro do evanxeo. Ti que vives e reinas por sempre eternamente. Amén.*

### 3.- OS SIGNOS DA COMUÑÓN CON DEUS EN FAMILIA

#### NOSO PAI

**Celebrante:** *Un dos grandes tesouros que nos ensinou Xesús foi dicirnos que Deus é o noso Pai e que por iso todos somos irmáns. Fagámolo realidade rezando:*

*NOSO PAI ...*

#### SIGNO DA PAZ

**Celebrante:** *Xesús dános o tesouro da paz compartida. Que nós saibamos atopar tamén ese tesouro na nosa vida e fagamos partícipes del aos que nos rodean. Ser seguidor de Xesús é ser testemuñas de evanxeo coa nosa vida. Fagamos da fe tesouro.*

#### NON COMULGAMOS PERO ESTAMOS EN COMUÑÓN

**Celebrante:** *O gran tesouro da fe que vivimos hoxe pídenos un compromiso formal para facer entre todos realidade o Reino de Deus no noso mundo.*

*Ditosos nós que somos convidados a recoñecer este tesouro de Deus na nosa vida de casa facéndoos crible cos nosos feitos e palabras.*

### 4.- AVISOS E DESPEDIDA

#### ORACIÓN FINAL

##### **Celebrante:**

Oremos: Señor, dámosche as grazas porque coma crentes e en familia podemos compartir a nosa fe.

Fai que, no camiñar de cada día, sexamos capaces de facer realidade o evanxeo, pois cremos que nos chamas así a colaborar no teu Reino.

Grazas polo exemplo que nos dás en Xesús, o teu fillo benquerido, que vive e reina con nós por sempre eternamente.

*Con Xesús queremos dar grazas polo tesouro da vida sinxela e polas persoas que nos ensinaron a vivila.*

*con Xesús o Reino de Deus facémolo crible cos feitos da xustiza, da fraternidade e da responsabilidade persoal.*

*con Xesús damos grazas a Deus Pai por todas as persoas que son para nós un tesouro de fe.*

***Que teñamos un bo día, unha boa semana,  
e o Señor nos bendiga, † nos garde de todo mal  
e nos leve ao seu fogar de vida eterna. Amén.***

***Avísase das misas (ver folla do mes).***



“O Reino dos Ceos é semellante a un tesouro agachado nunha leira: o home que o atopou, vai vender canto ten para mercar aquela leira”

*Palabras de Xesús no evanxeo de hoxe.*